

國學書

清代傳記叢書



明文書局印行

清代傳記叢刊・綜錄類⑦
周駿富輯

國朝耆獻類徵初編
(二)

卷一六六至
卷一七五

(清)李桓輯



明文書局印行

國朝耆獻類徵初編卷百六十六目錄

疆臣十八

鄂海

那蘇圖

李珣

張謙

沈廷正

齊蘇勒

白鍾山

張鉞

國朝耆獻類徵初編卷百六十六

通奉大夫前署江西巡撫江西布政使司布政使湘陰李桓輯

疆臣十八

鄂海

鄂海滿洲鑲白旗人姓溫都氏由筆帖式授內閣中書游陟宗人
府郎中兼佐領康熙三十六年 聖祖仁皇帝親征噶爾丹鄂海
先赴甯夏儲備牲畜 駕至甯夏會陝西按察使缺 命於軍營
辦事之科道部郎內開列具奏 特簡鄂海任之 諭曰初任外
官者每於朕前奏言潔清其身以圖報恩及莅任後輒背其言朕
於從官二十餘員內簡爾爲按察使爾當益勵素行也三十七年

遷陝西布政使四十年擢陝西巡撫四十二年十一月 上幸西
安閱兵以滿洲及綠旗兵皆善射鄂海與將軍博靈總督華顯並
賜囊韃弓矢及 御書扁額貂皮冠服加一級十二月 詔於
河南府儲積米穀豫備山西賑貸並 命督撫等會勘由黃河輓
運事宜明年三月會勘三門底柱湏急灘多舟行甚險應自河南
府陸運至陝西太陽渡乃以舟運四月鄂海又奏勘閩渭河惟自
寶雞至郿縣一百四十餘里水落時重載難行郿縣以東河深水
平重船可以輓運疏下部議渭河與山西之汾河河南之賈魯河
並令巡撫設法挑濬四十九年十月擢湖廣總督五十一年五月
疏言臣前赴鎮筸閱視邊界聞邊外紅苗恃強滋事雖經永順土

司招撫並未納糧乃令總兵張谷貞辰州知府遲熾鳳凰營通判
黃樹傳集苗目宣布 聖主威德令其改過輸誠於是毛都塘等
五十二寨頭目開具八百餘戶丁口赴武昌投順八月又報盤塘
窩等八十三寨投順頭目續至得 旨鎮筸生苗居深山之中自
古以來並未向化鄂海等宣示朝廷德澤布揚聲威盡行招撫殊
屬可嘉在事官弁交部議敘今紅苗等已輸誠削髮宜安插得所
從容化導教之禮義文武官弁其各仰體朕無分內外咸俾同享
昇平宇內無不安樂之意五十二年四月 上以鄂海曾任陝西
才具素優兵民性情俱所熟悉調四川陝西總督十月疏言甘肅
洮岷邊外大山生番悉歸順得 旨洮岷邊外並無生番或係與

外藩蒙古王貝勒貝子公台吉等納糧之人不可止以投順爲美
名其事甚有關係當再行詳察尋奏大山在洮州東南近土司楊
汝松界外非蒙古納進番人今既率屬歸化請卽以楊汝松管理
又疏言四川建昌鎮屬會川營界外涼山番目阿木哨率屬歸順
願每歲貢馬四匹請給職銜其所屬三千餘戶仍令管理五十三
年正月疏言去歲甘肅所屬靖遠固原會甯諸處夏田少雨秋禾
失收疊奉 恩諭全免五十三年錢糧又經撫臣岳拜請動倉糧
賑恤亦奉 旨允行已遵照籌辦外惟是甘肅山高地冷歲止一
收民無儲畜其被災戶口或借或糶或賑三法並行災民方得安
堵且春夏間青黃不接小民謀食無由宜乘春和時耕種若無籽

粒牛具田畝坐荒秋收又復無望請於被災等處乏食窮民自二月至六月止日給糧大口三合小口二合以資養贍其有田地而無力耕作者每畝給糧五升每頃給銀三兩以爲籽本令所在道府等官確察妥辦諭令竭力耕種至流移未歸者臣與撫臣捐貲齎送回籍後如屋宇傾壞令地方官捐修安插十一月以朝邑縣與山西蒲州接壤疏請將同州州同及潼關營千總移駐以資彈壓事並下部議行五十六年十月四川巡撫年羹堯勦撫越巂萬阿羊叛番奏繳土百戶印劄並奏把總皮登榜被射身死部臣以所繳印劄未聲明西糾土百戶阿卡何往又皮登榜被射情節前後所奏不符令鄂海確察尋奏土百戶阿卡因大兵進勦畏懼潛

逃已經招回西糾至年羹堯前奏皮登榜督造浮橋中箭身死今
據提臣康泰等咨稱實係身先渡河奮擊叛番被賊射斃乞 敕
部議卹賞疏下部議令川撫酌行給賞五十七年大兵征策妄阿
拉布坦撫遠大將軍貝子允禩等率兵分駐西甯甘州莊浪豫備
進剿鄂海奏撥西安藩庫銀四十萬兩解赴甘省協濟糧芻又奏
撥平涼鞏昌甯夏貯倉積穀十萬石運赴蘭州充餉又府谷山丹
等州縣衛以軍行所過奉 旨免徵錢糧草束并請豁免一體運
送軍需之陝屬葭州甘肅甯夏等二十八處丁糧以紓民力五十
八年四月又言 皇上軫念西陲百姓轉運急公 特恩蠲免五
十八年地丁銀兩以軍務未竣不及米豆草束第各省額徵類多

折色惟甘省邊地銀數少而糧草多至平涼慶陽西甯涼州等府
且有全徵本色者是沿邊軍需用力最多之地轉不得共霑實惠
請將甘屬五十三四五六等年未完民欠錢糧草束一例蠲免使
民盡力輸納本年額徵糧草以佐軍需則 皇仁溥而民氣裕疏
下戶部寢其議奉 特旨盡予豁免五十九年五月固原提督金
國正疏奏陝西兩年歉收百姓有流離狀 諭曰總督鄂海平昔
居官亦優今因年老聲名漸不如前陝西兩年歉收之處並未詳
悉上聞其令明白回奏鄂海尋奏西安等四府一州比歲豐稔惟
延安沿邊堡所及甘肅涼州諸處歉收俱經題報所有五十七八
兩年借給災黎銀米謹彙列實數陳奏疏入報 聞六十年五月

命鄂海辦理軍前糧餉而以四川巡撫年羹堯代爲總督十月
疏言遵旨至甘州料理糧餉甘州等處山多田少所產糧草有
限宜豫爲籌備請於河南湖廣運至陝西糧餉內撥米六萬石疏
豆四萬石半送甘州半送涼州從之十二月諭議政大臣曰
吐魯番見駐官兵其可種之地甚多總督鄂海在軍營無事可卽
往彼效力六十一年六月靖逆將軍富甯安請派大臣專司吐魯
番種地積糧上命鄂海同副都統克什圖管理遇有軍務一體
調遣世宗憲皇帝雍正元年十月以原品休致仍在吐魯番種
地效力三年四月卒

右 國史館本傳

那蘇圖

那蘇圖滿洲鑲黃旗人姓戴佳康熙三十六年襲雲騎尉世職五十年授藍翎侍衛遷治儀正雍正元年遷雲麾使二年授頭等侍衛五年四月遷鑾儀使七月授兵部侍郎十二月命爲黑龍江將軍八年調奉天將軍十二年疏言興京岫巖鳳凰城民員窩逃捕役不能徧及僅有失事請將旗員查參民員協緝其餘各城旗民官一體巡查互揭隱庇疏防失察者旗員由將軍民員由府尹題參限緝路斃命案旗員文武會驗查拏下部議行乾隆元年正月奏言齊齊哈爾所屬烏蘭諾爾驛站至瑚蘭河向設六臺皆以民力富差請每站派兵十給馬五牛五以備運送公文官物呼倫

貝爾向設十臺請停撥波爾德兵百挑索倫無牲畜人六十免納
貂皮差安六臺再挑呼倫貝爾兵四十安四臺 從之八月擢兵
部尙書二年正月調刑部尙書九月授兩江總督先是協辦吏部
尙書顧琮請設塘堡復衛所下江浙督撫詳議三年八月那蘇圖
條奏八事一明沿海衛所武事廢弛我 朝裁衛設營江南有金
山柘林青村南匯川沙吳淞劉河等營提標駐松江控制崇明狼
山二鎮對峙海口塘汛兵聲連絡琮請復衛所無庸議一礮臺有
應改添修葺者華亭縣滌缺墩改建臺一柘林城南門福山營挑
山嘴各添建臺一吳淞營王家嘴舊臺海潮衝刷應移建塘內劉
河營北七丫口舊臺已圯應修一礮臺舊制高二丈屋九架瞭望

門入大小礮入置屋內穴牆施放未便應拆房屋圍牆設垛口安
放礮位置木蓋蔽風雨畱屋二貯火藥一明自浙江乍浦及江南
金山柘林青村南匯川沙寶山吳淞劉河福山共建十城分兵駐
守今劉河半坍入海劉河營移駐舊城西北茜涇卽請茜涇建城
一墩臺營房向在塘下宜將土塘幫寬二三丈高與塘平墩臺卽
築塘上旣資瞭望兼護塘身一崇明鎮西南之二條監河顧四房
溝及堂沙頭港地關緊要請於三處添弁兵及車輪礮一海商出
入海口稽查已嚴至支河汊港恐有乘閒出入者應令地方官及
弁兵一體嚴查議行先是兵部侍郎吳應棻等條奏江廣原撥閩
省倉穀三十萬石內改撥二十萬石截畱江南其餘運交閩省十

月那蘇圖奏言今歲兩江被旱需賑濟平糶已往江廣等處採買見在陸續運回其上年不被災州縣本年應徵漕糧全行截留兩江米穀不虞缺少閩爲海疆重地本省既不產米鄰省海運不易若截留三分之二則倉貯仍不充裕應請截留十萬石分撥兩江缺米州縣存貯餘二十萬石仍運閩爲便得 旨所見甚屬可嘉實封疆大臣之度也又疏陳海塘事宜一奉賢南匯上海寶山等縣土塘應如前督臣趙宏恩前撫臣顧琮所請歲加修補一奉賢等縣從前建塘時於塘根取土成溝前撫臣楊永斌慮積水漫溢奏請因勢開河但水侵塘根易損應離塘根二十丈挑挖其不及二十丈者仍令填補成岸一倪家路土塘海水汕刷恐致衝損應